

UULIAMUT TANKI PAARALUGU

Maangaannartitsineq akisuujusinnaavoq

Uuliatortumik kiassaatilinnut ilitersuut



Februar 2008



NUUP KOMMUNEA
Teknikkimut Avatangiisinullu ingerlatsivik
Postboks 1005 · 3900 Nuuk

NALUNNGILIUK:

- Ukiut tamaasa Nuup Kommuneani uliatortumik kiassaatillit tankiinit uuliarluernerit arlalissuusarmata.
- Tankimit uuliarluineq eqqaani nunamik mingutsitsisarmat aamma inunnut, avatangiisimut, illup iluani silaannarmut kiisalu erngup aqputaannut ulorianaateqarsinnaammata.
- Uuliarluernerup salinneranut aningaasartuutit titusindilikkaanik naleqalersinnaammata.
- Illit tankimik piginnittutut uuliamut tanki akisussaaffigakku uuliarluertoqassagaluarpallu saliinissaq illit akiligassaralugu.

Ukiuni kingullerni uuliamut tankiniit uuliarluernerit kommunimi nalunaarsorneqartartut amerliartuinnarput. Uuliarluerneq assigiinngitsunik pissuteqarsinnaavoq, aamma seerisoorneq, ulikkaartoorneq, tankip inissinnerlunneqarnera imaluunniit kukkusumik ruujorinik ikkussuineq aamma /imaluunniit aserfallatsaaliuinnginneq matumani ilaapput. Avatangiisimut ajoqusiisarput aamma piginnittumut, piginnittormi uuliarluernerup salinneqarnissaanik akiliisussanngortinneqartarmat. Ulloq manna tikillugu saliinermut atatillugu saliineq kisiat 50.000 kr.-nik naleqarsinnaasoq takussutissaqartinneqarpoq.

Taamaammata uuliamut tankip uuliamullu atortulersuutit akuttunngitsumik misissorneqartarnissaat tamanut iluaqutaalluinnassaaq. Quppersakkami uani uuliarluernaveersaarnissamut aamma qanoq pinngitsoortitsisinnaanerit pillugit siunnersuutit iluaqutaasinnaasut ilitersuutillu atuarsinnaavatit, taamaalillutillu avatangiiseq illillu aningaasaqarnerit innarlitsaalisinnaallugit.


Nalornissuteqassaguit, ikkussorneqartut qanoq inneri imaluunniit qanoq uuliarluernaveersaarnissaat pillugit, taava uliatortumik kiassaatinik ikkussuisartoq attavigisinnaavat uliatortumik atortup misissortinnissaa pillugu.

TANKIP IKKUTERIIKKAP, RUUJORIT ALLALLU MISISSORNISSAAT.

Uuliamut tankip taassumalu ruujoriisa qanoq attartutigisinnaanerinut ilaatigut atortup qanoq pisoqaatiginera, sannaq, suliarineqarnera, nunataa, toqqavia kiisalu qanoq aserfallatsaalineqarneri apeqqutaapput. Tulliuttuni uuliamut tankip qanoq misissornissaanik aserfallatsaalineqarnissaanillu siunnersuutit ilitersuutillu ikiuutaasinnaapput, taamaalillunilu piffissaagallartillugu iluarsisariallit iluarsineqarsinnaassammata.

- Tanki ruujoriilu qanoq innersuk misissukkit. Ajoquteqarpat? Ajoqutaasut tassaapput – taakkuinnaanngillalli – singlarnerit, ruujorit najunngarsimasut kiggisimasulluunniit, katiterivimmu (fitting) ikkuffiit ajoqusernikut, uuliamut uuttuut ajoqusernikoq sigginnikorluunniit, svejsernerani naffakoq ammasorluunniit, nunami tinupaninnguuttoq imaluunniit qerisimasoq. Ajoqutit taamatut ittut tankip qaavanik iluanilluunniit nungullartitsisinnaapput aamma ruujorit aqputaannik tankilluunniit ussissuanik ajoqusiisinnaapput.

- Tanki manngertornersimanersoq misissoruk. Manngertornertut ittut imaluunniit pullaaserartut tagiartornissaat mianersuutigiuk. Tanki manngertornisoq sallaatsumilluunniit naqinneqaraangami putusinnaasarpoq. Tankip silatimigut isikkua kusanarpat imaangilaq manngertorninngitsoq – nungullarnera iluanit pisinnaavoq.
- Tankip naqqani imeqalersinnaavoq aalamit pisumik, taamaalillunilu iluanit nungullalersinnaalluni. Tankip naqqani imeq naqqatigut ventilikkut peerneqarsinnaavoq aamma allarut imermik milluaasinnaasoq atorneqarsinnaavoq imaluunniit akuutissaq uuliamik immikkoortitsisinnaasoq atorlugu.
- Naasut/issoq, sermeq, aput allallu tankimiittut ataaniittullu piiakkit, taamaalilluni tanki inissaqarluualissammat. Tanki illumut attuumatinneqassanngilaq. Arlaannut talisimatinneqarneratigut nungullajaartinneqarsinnaavoq.
- Immertarfiata matua ikkusimanersoq eqqortumillu ikkusimanersoq misissoruk, ulikkaarneranut nalunaaqutaata milissimannginera ilanngullugu.
- Tankip patajaatsumik toqqavimmiinnera, tankip ataani toqqavia ilanngullugu, misissoruk. Sumiiffinni pingaartumik sermerfiungaatsiartartuni nunap nikerarneratigut tanki uppisinneqarsinnaavoq ruujorilluunniit ajoquserneqarsinnaallutik. Taamaattumik tanki maggusimappat toqqissunngortinneqassaaq.
- Illup qaavanit aput sermilluunniit tankimut nakkarsinaanera misissoruk aamma ruujorit asserneqanngitsut ilanngullugit.
- Uuliamut atortakkatit naatsorsortakkit akuttunngitsumillu tankip qanoq imaqartiginera misissortarlugu.
- Tankip assaasat manngertornersinnaapput ersinngitsumillu seerisinnaallutik. Uuliamik atuinerulerneq maluginiaruk. Atuinerulersimaneq seerisoormik pissuteqarsinnaammat.
- Aasaanerani tanki ulikkaarsimatinniartaruk ersarissumillu qalipaateqartillugu. Taamaaliornikkut aalap tankimi iminnguussinnaanera annikillisinneqarsinnaammat.
- Ruujorit attavii tamaasa eqqiluutsuutikkitt ussissuutillugillu. Uuliarluernerit nakkutigikkitt.
- Tankip kiassaatillu akornanni ruujorit aputinitsaaliorgillu sermitsaaliukkit allanilluunniit ledningimik putusoortitsisinnaasut mianersuutigikkitt.




- Tanki tamaat, niului naqqalu ilanngullugit, qalipaammik manngertorninermut illersuutitalimmik qalipagut.
- Uuliasunnissinnaanera eqqumaffigiuk.
- Immiinnginnermi immeereernerullu kingorna ulikkaarneranut nalunaaqutaa, immerfia tankillu naqqa putoqarnersoq seerisimasoqarnersorluunniit misissukkit. Allanguutit tankip immerneqarneratigut ersarinnerulersarput. Nuna taartumik isugutannertalik, qaarsoq naasullunniit asingasut seerinerlut takussutaasinnaapput.
- Immiinerup kingorna utersaartoortoorsinnaanneq misissoruk, tassa uuliap ruujorikkut aniasoorsinnaanera. Taamaattoqassappat pinngitsoortitsisinnaasunik upalungaarsaateqassaait.
- Uuliamik nioqqutilik assartuisorlu peqatigalugu ulikkaartoornermut kalerrisaarutip (siggartaatip) ajoquteqannginnera misilissiuk.
- Uliamut tankivit ruujorilluunniit ussissuuneri nalornissutigigukkit misilinneqarsinnaapput. Atortui uuliartaqarpata taava silaannaarlugu misiliineq ingerlanneqassaaq. Atortui imaqanngippata taava naqitsineq atorlugu misiliisoqassaaq. Ikkussuisartoq periarfissat pillugit oqaloqatigiuk.
- Tanki allamik taarserneqartillugu tankikup imaa nutaamut nuunneqassanngilaq. Minguk, syre, tappiorannartut imerlu tankikumiittut tankertaamik nungullajaartitsissapput taamaalillunilu sivikitsuinnarmik nutaaq pigineqarsinnaalissaaq – uuliarluernissamullu qaninnerulerluni.

TANKIP NUTAAP ILLUP ILUANIITINNERA

Periarfissaqarpat tanki illup iluaniitinneqartariaqarpoq. Illup iluaniititsineq arlalinnik iluaqutitaqarpoq – tanki silap sunniineranut anorimillu illersorneqassaaq, tankip aalamit pisumik imeqalernissaa annikinnerulissaaq taamaalilluluni iluaniit nungullarnissaa annikillisinneqassaaq. Tankit illup iluaniitinneqartut ajoqusernissaat aserornissaallu annikinnerusarpoq. Nalinginnaasumik tankimik illup iluaniititsinermi tanki sivisunerusumik pigineqarsinnaavoq, aserfallatsaaliinermut aningaasartuutit annikinnerusinnaapput maangaannartoornissarlu annikinnerulerluni. Taamatullu ruujorit qerisoornissaat ernumanaateqarani.

- Ikkussuisartutut ilinniagalik ikkussuisiguk.
- Tankit uuliaasivittut atugassatut naatsorsuussat kisimik atorneqassapput. Tankit atornikut atorneqassanngillat. Tankikut pissuteqartumik atorunnaarnikuusarput – soorlu ussiillimasinnaapput pisoqalisimasuullutilluunniit. Tankit atoreernikut uuliarluernissamut qaninnerulersitsisarput.
- Tanki illup iluani suliaasanut akornutaanngitsumut inissiguk.


- Tanki inissinneqassaaq tamaat misissorneqarsinnaasunngorlugu. Qulakkeerniaruk tanki iikkanit marlunnit minnerpaamik 10 cm.-inik ungasissuseqartinneqarsinnaanera, iikkanit allanit 45 cm.-it kiisalu natermiit 10 cm.-inik qullasinnerunissaa.
- Inissisimaffiani kuuffeqassanngilaq, uuliamik ulikkaartoorutip kuuffigisinnaasaanik.
- Matup ammarngi alloriusai ima portutigissapput – ussitsigissapput – tankimit seerisoqarsimassappat naqqaniissinnaalluni ininullu allanut kuussinnaanani. Allatut tanki iluliumanermiitinneqarsinnaavoq.
- Ruujorit tankip iikkallu akornaniitinneqassapput, ruujorit ajoqusersinnaajunnaarsillugit.
- Uuliamut tankip kiassaatililu akornanni ruujorit katitinneqassanngillat.
- Tunniussisartut eqqarsaatigalugit immerfia ersarissumiitinneqarlunilu tikikkuminartumiitinneqassaaq.
- Tanki ulikkaartoornissamut kalerrisaaruteqartinnaasaa isumagiuk (siggartaat) akuttunngitsumillu atorsinnaanera misilittarlugu, immiiffimmiit tusaaneqarsinnaasassaaq.



TANKIMIK SILAMIITINNEQARTUSSAMIK IKKUSSINEQ

Tankit silamiitinneqartartut tamarmik silap allanngorartarnera pissutigalugu aalatinneqartuutarput, nunap qerinera pissutigalugu nunap qattuninngortitertarneranik nunallu nikikkiartortarneranik kinguneqarsinnaasumik. Taamatut pisoqarnissaa annerusumik nutaamik sanaartornermut atatillugu pisinnaavoq, tassalu nuna/ujaqqat piiarneqareerlutik immiutigineqaqqikkaangata. Aamma anorip sakkortuup tankip patajaassusianut sunniisinnaavoq. Ataani siunnersuutitut allassimasut uuliarluernissamik pinaveersaartitsinermit ilapittuutaasinnaapput.

- Tanki toqqavimmut patajaatsumut inissiguk, uppittussaajunnaarlugu. Tanki ulikkaaqqasoq 1.200 literimik imalik 1 ton sinnerlugu oqimaassuseqartarpoq. Maluginiassavat toqqaviata aalaqqajunnginnissaa nunallu qerineratigut aalalinnginnissaa.
- Tanki sermimit apummilluunniit soorlu illup qalianit nakkaffigisinnaajunnaarlugu inissiguk, tanki ruujoriiluunniit ajoquserneqarsinnaammata tankilu pilertornerusumik nungullartillugu.



- Tankip toqqavia asserneqarsimassanngilaq panertuutinneqassallunilu.
- Tankip illullu akorna silaannaqartinneqassaaq, minguit isugutatsitsisut katersuuteqqunagit.

- Tanki naaneqartinneqatsaaliussaaq. Isugutannerata tanki pilertornerusumik nungullartissinnaammagu.
- Tanki naammaginatumik illersuuteqartiguk, sumiiffimmi qamutunik motorilinnit tikikkuminartumiitillugu.
- Ruujoriinut atortulersuutit taakkununga naatsorsuussat kisiisa atukkit, nillissutsinut assigiinngitsunut atorneqarsinnaasut. Slangit, ventilit, pakningit allallu uuliamut illersuutitaqassapput.
- Ruujori qummooriarlugu peqingasunngortinneqassaaq, tankip aalasarnissaanut illersuutissamik.
- Ruujorip aqputaa illersuuteqartinneqassaaq, soorlu ruujorimut PVD-mik assigisaannilluunniit illersuutitalikkoortinneqarluni taannalu kingorna beton-imik qallerneqarsinnaavoq.
- Immerfia allallu ventilit silamiittinneqartut parnaartartunngortinneqassapput imaluunniit susassaqqanngitsunit passunneqarsinnaajunnaarsinneqarsimassapput.

Kalaallit Nunaanni uuliamik kiassaatinik ikkussuinissamat malittarisassat atuuttut allat, ilaatigut aamma ikuallattoornermi sillimmasiinermut tunngasut, innersuussutigineqassapput. Malittarisassat atuuttut uani atuarneqarsinnaapput:

<http://www.byginform.gl/Publikationer/Forskrifter/tabid/63/Default.aspx>.

TANKIKUNIK IGITSISARNEQ

Uuliamut tanki atorunnaaraangat avatangiisimut illersorneqarsinnaasumik iginneqartassaaq. Tanki – peqqissaartumik imaarneqareerluni minguiarneqareerlunilu – Saviminernut eqqaavimmut tunniunneqarsinnaavoq. Uuliakoq mingullu kommunip tigooraavianut ikuallaaviup eqqaaniittumut tunniunneqassapput.

ANIASOORTOQASSAPPAT

Qanorluunniit pinaveersaartitsigaluaaraanni ajutoortoqarsinnaasarpoq. Pingaaruteqartuuvoq tuavioernerpaamik

- Aniasoornermut pissutaasup unitsinnissaa (aqqutaanik matusineq, miligusiineq assigisaannilluunniit)
- Aniasoortup siaruatsaaliornissaa
- Kommunimik attaveqarnissaaq

Uuliarluernermi Nuup Kommuneani Attaveqaatinut Avatangiisinullu immikkoortortaqarfiup kalerrinnissaa kiisalu mingutsinneqartup salinneqarnissaa piginnittup akisussaaffigivaa. Kommune uunga sianerfigineqarsinnaavoq 34 70 00.

